

La'ó Hamutuk

Institutu Timor-Leste ba Monitor no Analiza Dezenvolvimentu

Rua Dom Alberto Ricardo, Bebora, Dili, Timor-Leste

Tel: +670-3321040 ka +670-77234330 (mobile) email: laohamutuk@gmail.com

Website: www.laohamutuk.org



Submisaun ba

Diresaun Nasional Alterasaun Klimátika

Husi La'ó Hamutuk

Kona-ba

Proposta Lei Baze Mudansa Klimátika

21 Outubru 2024

Introdusaun

Mudansa Klimátika ohin loron, ezije ita hotu nia asaun no kometimentu ba mitigasaun no adaptasaun hodi prevene no asegura planeta mundu ida ne'e. Nasaun ki'ik no vulneravel, hanesan Timor-Leste, kontinua moris iha situasaun ne'ebé perigu no laiha serteza. Rai kontinua manas, udan la tuir ona nia tempu hodi prejudika atividade produsaun ai han no ate piór liu mak llla ki'ik sira hahú laiha fatin ka espasu hodi hela, tasi komesa sa'e, temperatura manas no rezulta kauza oin-oin hanesan rezerva bee rai okos menus ba bei-beik, no afeta mós ba ikan no ahu-ruin sira hetan estragus, inundasaun no inséndiu akontese iha nasaun barak.

La'ó Hamutuk apresia tebes ba prinsípiu husi elaborasaun Ezbosu Lei ida ne'e, hanesan deskreve iha artigu 5. Ami apresia ba Governu Timor-Leste ne'ebé iha iniciativa elabora Planu Dezenvolvimentu Nasional ne'ebé sensível ba adaptasaun global hanesan prioridade ida ba nasaun ne'e nian, no la'ós tanba agenda kompañia petróleu no nasaun riku sira atu avansa ho projetu spesífiku ba net zero karbonu no dekarbonizasaun. Ami deskorda no rejenta ho Net Zero, tanba la hatudu Zero Emisaun maibé ne'e hanesan meius atu fó nafatin oportunidade ba kompañia sira atu kontinua halo estrasaun hodi planeta mundu ida ne'e iha risku nia laran.

Mitigasaun loloos mak tenke hapara produsaun no uzu kombustível fossil atu lori solusaun fundamental ba krize klimátika ne'ebé mundu ohin loron enfrenta hela. maibé la'ós kontinua promove projetu dekarbonizasaun, fundu global ne'ebé inklui projetu reflorestasaun versaun kompañia ka nasaun dezvoltidu sira.

Reflorestasaun importante atu ajuda redús krize klimátika maibé labele sai razaun atu justifika kontinuasaun ho fábrika ka indústrria sira ne'ebé aumenta gas estufa no destroi liu tan ita nian klima global.

Ami nota katak, nasaun industrializadu sira la tuir sira nia kompromisu, hanesan iha konferénsia boot ne'ebé kontinua ko'alia no fó alarme ba mundu tomak katak planeta mundu ida ne'e iha perigu nia laran hodi prevene temperatura liu grau 1.5°C iha 2050. Realidade, tinan 10 ikus, atividade indústrria mina-rai no gas kontinua kontribui gas estufa sa'e ho volume aas. Situasaun ida ne'e hatudu katak nasaun boot no kompañia industrializadu sira seidak iha kometimentu ba prevensaun mudansa klimátika agora no futuru.

Presiza Promove Justisa Klimátika

Luta ba Justisa Klimátika tenke iha esforsu boot husi parte hotu inklui hanesan forsa diplomátiku Timor-Leste sira liu husi konsuladu no embaixadór. Atu utiliza oportunidade hodi ko'alia maka'as ba kooperasaun sira no evita atu konkorda ho akordu hotu ne'ebé fó risku no kontinua halo mundu iha perigu nia laran. Tanba, ami haree katak maioria husi kooperasaun internasionál sira aplika akordu ne'ebé la realistíku ba prevensaun mudansa klimátika.

Seidak tarde atu luta ba justisa klimátika, maske Timor-Leste nia kontribuisaun ki'ik tebes ba iha klima ne'ebé kada periodu muda an, maibé Timor-Leste iha responsabilidade moral ida hodi kontribui ba redusaun temperatura nia manas no evita risku sira seluk ne'ebé mai husi atividade mina-rai no gas. Inklui mós atividade husi "emisaun eskope 3" hodi hasai responsabilidade ba gás estufa ne'ebé rezulta husi kombustivel fossil ne'ebé mai husi ita-nia territóriu.

La'o Hamutuk apresia tebes ba iniciativa hodi halo konsultasaun públiku ba Ezbosu Lei ida ne'e, tanba iha lei barak mak publika no implementa ona maibé la halo konsultasaun públiku. Ami mós apresia tanba hetan priviléjiu hodi asesu dokumentu ezbosu Lei ida ne'e no fahe ba entidade sira. La'o Hamutuk mós konkorda ho artigu balu iha Ezbosu Lei ida ne'e, liu-liu asaun ba adaptasaun ne'ebé promove Sistema Agrikultura sustentável no reziliente atu kombate desertifikasaun no hasa'e seguransa ai-han inklui mós promove enerjia renovavel. Ami hanoin katak, lei ba prevensaun no aseguara sistema xave importante mak tenke iha kometimentu no iha asaun konkretu, dala barak kompromisu sira deskreve di'ak tebes, maibé la hatudu iha asaun. Hanesan Dekretu Lei Baze Ambientál No. 5/2011, ne'ebé kompañia barak la kumpre no viola maibé laiha sansaun todan, no fó dalan ba kompañia kontinua viola.

La'o Hamutuk mós preokupa ho artigu balu ne'ebé deskreve ba asaun mitigasaun atu mantén temperatura nia manas labele liu 1.5°C, maibé husi ami nia haree la deskreve atu hapara imediatu. Mitigasaun ida loos mak tenke hapara atividade indústrria mina-rai no gas inklui mós mineiru, la'ós liu husi projetu Net-Zero, CCS no merkadu karbonu. Ami hanoin katak projetu sira ne'e, labele hamenus krize klimátika no maneira sira ne'e hanesan meius atu kontinua fó lisensa ba kompañia hodi halo estrasaun ba kombustivel fossil. Ami hanoin katak merkadu karbonu la efetivu no la justu ba nasaun vulneravel sira.

Carbon Capture Storage - CCS iha nasaun barak hatudu ona la efetivu, kustu karun inklui nasaun barak mak abandona. Nune'e Governu presiza tetu ho kuidadu ba projetu CCS iha Bayu Undan

atu evita Timor-Leste sai hanesan fatin lixu husi nasaun riku sira, inklui Santos no kompañia indústrija estrativa seluk atu hetan lukru husi kampu Barossa no fó risku ba Oceano no territóriu Timor-Leste iha futuru.

Funionamentu Konsellu no Konteúdu Ezbosu Lei

Alende artigu balu ne'ebé ami hanoin prezisa tetu no haree ho kle'an, ami mós preokupa kona-ba estabelesimentu Fundu Nasional ba Mudansa Klimátika ne'ebé atu evita agrikultór sira ba prodús ai-han, no muda sira nia atividade hodi kuda de'it ai atu responde demanda merkadu karbonu, tanba iha valor ekonómiku. Nune'e mós ami preokupa kona-ba estabelesimentu membru Konsellu Nasional Asaun Klimátika, ne'ebé nia servisu atu fó de'it konsellu. Ami hanoin katak atu la repete konsellu sira ne'ebé estabelesidu ona maibé la efetivu (hanesan: KKFP) no evita atu to'o ikus transforma fali ba Empreza Públiku no Institutu Públiku. Alende ne'e mós katak mekanizmu rekrutamentu ba membru KNAK ne'e rasik mós sei difisil no komplikadu bainhira identifika membru sira.

Husi La'o Hamutuk nia leitura ba Ezbosu Lei ida ne'e iha versaun Tetun no Ingles, iha artigu balu ne'ebé nia tradusaun prezisa atu hadi'a molok promulga. Hanesan artigu 5 sobre Prinsipiu sira no Artigu 38 Sobre Teknolojia Kapturasaun no Armazenamentu Karbonu, inklui mós prezisa atu hadi'a nia versaun iha artigu balu ne'ebé ba ami ladún klaru, hanesan artigu 14 sobre Projeitu Sekestrasaun Karbonu no Merkadu Karbonu nian.

Nune'e liu husi Ezbosu Lei Mudansa Klimátika ida ne'e, La'o Hamutuk hakarak kontribui ideas no rekomendasaun balu atu aban bain rua, Lei ne'e rasik fó duni vantajen ba Timor-Leste no ba mundu nia klima.


Ami ne'ebé hato'o:



Marta da Silva



Celestino Gusmão



Elizaria Febe Gomes



Charles Scheiner



Mariano Ferreira



Jonathan Gonsalves

No.	Artigu	Preokupasaun	Rekomendasaun
Artigu 2 “Definisaun Sira”			
1.	g): Merkadu Karbonu: interese sira ne'ebé reprezenta reivindikasaun ka direitu hotu-hotu ne'ebé pessoa singular ka koletiva, pública ka privada, sira iha, eskuzivamente, ba redusaun emisaun ka halakon Gas ho Efeito Estufa, inklui redusaun ka halakon emisaun sira ne'ebé iha atividade iha rai liu husi Agrikultura Karbonu;	Merkadu karbonu, la'ós atu halakon emisaun, maibé hanesan meius hodi a favor ba atividade indústria mina-rai no gas, atu kontinua halo esplorasau, no fó valor ba karbonu hodi justifika katak maske estraga atmosfera maibé iha valor ekonómiku hodi ema kontinua negósiu fo'er (dirty business) ida ne'e. Tanba iha realidade, dados hatudu katak emisaun gas estufa kontinua sa'e.	Definisaun tuir La'o Hamutuk kona-ba Merkadu Karbonu katak mekanizmu ida ne'ebé ema hotu-hotu iha interese atu valoriza hanesan atividade ekonomia ida hodi fó presu ba Karbonu, ho objetivu atu redús emisaun gas estufa maibé la'ós atu halakon.
2.	j): Mudansa klimátika; Mudansa ida ba Klima ne'ebé afeta direta ka indireta ba atividade umanu ne'ebé altera kompozisaun atmosfera globál no aumenta variabilidade Klimátika natural ne'ebé observa durante periodu tempu ne'ebé komparável;	Ami hanoin presiza define katak mudansa klimátika nia kauza no problema hun mai hosi atitude umanu liu hosi atividade indústria boot no atividade mina-rai no gas, hodi halo temperatura klima kontinua manas hodi altera kompozisaun atmosfera, no ita tenke rekoñese ida ne'e. maske ami mós rekoñese katak natureza rasik bele halo klima muda nia an.	Ami rekomenda atu definisaun ba Mudansa Klimátika mensiona mós alende natureza mak muda nia an, kauza seluk mak atitude husi umanu liu husi indústria boot no atividade mina-rai no gas. Karik bele define nune'e <i>“Mudansa ba klima ne'ebé mai hosi natureza no atitude husi atividade umana hodi afeta direta no indiretu ba atmosfera...”</i>
3.	s): Mitigasaun: Intervensaun umanu ida atu hamenus fonte gas estufa sira hodi limita atuál ka futuru aumentu no/ka hadi'a sumidouru karbonu;	Mitigasaun la'ós intervensaun umanu ida maibé hanesan asaun konkretu ida husi entidade hotu-hotu ne'ebé iha interese ba planeta ida ne'e nia sustentabilidade, hodi iha konsiênsia atu hapara no redús atividade sira ne'ebé kontribui ba mudansa klimátika.	Tuir La'o Hamutuk, Mitigasaun hanesan asaun no maneira ne'ebé mai husi entidade oi-oin hodi redús no halakon kauza ba mudansa klimátika.
Artigu 3 “Aplikasaun”			
4.	Alinea 2: Tuir dispozisaun-sira husi UNFCCC no akordu internasionál no desizaun asociadu-sira, emisaun sira husi aviasaun internasionál ka transporte marítimu internasionál la konsidera hanesan emisaun husi fonte sira iha Timór-Leste ba objetivu husi Lei ida nee.	Esepsaun ba emisaun hosi aviasaun no transporte marítima, ami hanoin la presiza, karik ohin loron, Timor-Leste seidak iha movimentu maka'as hosi parte rua ne'e maibé iha futuru possibilidade boot, nune'e la presiza atu halo esepepsaun. Maske dispozisaun husi UNFCCC ko'alia nune'e, maibé Timor-Leste bele halo mós esepepsaun atu konsidera emisaun husi aviasaun internasionál no transporte marítimu internasionál.	Ami konkorda ona alínea primeiru, atu aplika ba kualkér atividade hodi husu responsabilidade husi parte hotu-hotu no la presiza iha esepepsaun. Maske UNFCCC la konsidera emisaun refere, la signifika Timor-Leste tenke tuir.

Artigu 4 “Objetivu Sira”			
5.	Artigu 4; Alinea i): Promove utilizaun fonte enerjia renovavel no sira-nia integrasaun iha Sistema Nasional Eletricidade;	Promove enerjia renovavel hodi sai hanesan fonte enerjia importante maibé, ami mós hanoin katak, prezisa no tenke prioriza hodi redús enerjia husi setór petróleu. No aléinde promove enerjia renovavel, atividade ba konservasaun mós parte importante ida.	Ami rekomenda atu estadu promove mós konservasaun no promove transporte públiku no marítima ne'ebé hadomi ambiente.
Artigu 5 “Prinsipiu Sira”			
6.	Artigu 5; Alinea 6: Partisipasaun, tuir ne'ebé sidadaun nia asosiasaun ambientál sira tenke envolve iha planeamentu, foti desizaun no avaliasaun ba polítika publika klimátika nian;	Partisipasaun ema hotu iha prosesu elaborasaun ideas ba asegura ambientál importante, no tenke envolve sosiedade hotu-hotu, la'ós de'it ema balu.	Ba asuntu ambientál, ami rekomenda atu tenke envolve elementu hotu-hotu, no la'ós halo esepasaun ba grupu balu de'it.
7.	Artigu 5; Alinea 9: Protesaun Ambiental, tuir ne'ebé tenke asegura prevensaun no mitigasaun ba risku ambientál sira ne'ebé iha relasaun ho Lei Baze Ambiental;	Timor-Leste iha ona Lei Baze do Ambiental (Dekretu-Lei Nu. 26/2012), ne'ebé ho objetivu atu asegura ambiente ida fresku, no asegura prosperidade umanu liga ba ambiente di'ak no sustentável. La'o Hamutuk hanoin katak importante atu iha duni vontade no kometimentu atu realiza saida mak lei orienta.	Artigu di'ak ona, maske ami hanoin katak importante atu hatuur loloos justisa iha asaun no tenke hetan apoia ho politikamente hodi atinje justisa klimátika.
	Artigu 5; Alinea 16; Kooperasaun internasionál, tuir ne'ebé asaun klimátika sei akontese iha nivel nasionál no internasionál, no rekoñesimentu katak implementasaun teknolojia avansadu liu ba deskarbonizasaun globál depende ba kooperasaun institucionál no ekonómika entre estadu sira;	Ami preokupa kona-ba mudansa klimátika, nune'e ami hanoin katak kooperasaun internasionál liu husi konferénsia boot sira hanesan COP no mós Konferénsia iha ONU, atu halo advokasia, la'ós atu utiliza kooperasaun hanesan meus ida hodi kontinua fó risku ba país ki'ik no vulneravel sira no iha tempu hanesan kria fundu hodi apoia. Kooperasaun Internasionál hanesan meus hodi hatuur loloos justisa klimátika no la'ós aproveita de'it.	Kooperasaun Internasionál importante duni iha síkulu ohin loron, maibé ami rekomenda atu lebele utiliza kooperasaun bilateral no multilaterál hodi fó risku ba país ki'ik no vulneravel sira no utiliza mós teknolojia atravesa deskarbonizasaun hodi kontinua fó risku ba país vulneravel sira. Ezemplu Governu Timor-Leste halo MoU hodi utiliza Kampu Bayu-Undan ba Projetu CCS hodi afavor ba Santos atu halo esplorasau iha Kampu Barossa husi Australia.

	<p>Artigu 5; Alinea 17; Informasaun, tuir ne'ebé sidadaun sira iha direitu atu hetan informasaun kona-ba impaktu husi alterasaun klimátika no kona-ba medida mitigasaun no adaptaun ne'ebé hala'o husi instituisaun públiku no privadu sira tuir Lei ida nee.</p>	<p>Konkorda katak Povu merese no iha direitu tomak atu hetan informasaun ba impaktu husi alterasaun mudansa klimátika, no tenke ho informasaun ida loloos no la'ós falsu, no La'o Hamutuk mós hanoin katak la'ós de'it atu hetan informasaun maibé presiza no tenke hetan mós informasaun kona-ba se mak halo no saida mak kontribui no halo hodi planeta ida ne'e kontinua iha perigu nia laran.</p>	<p>Ami rekomenda atu la'ós de'it hetan informasaun maibé informasaun ne'ebé tenke loloos, la'ós falsu no esplika se mak kontribui maka'as ba alterasaun mudansa klimátika. Ami mós rekomenda atu ekipa iha duni kapasidade hodi interpreta tuir lei orienta.</p> <p>Ami hanoin katak atu implementa hodi tuir artigu ida ne'e, presiza iha rekursu sira ne'ebé iha kapasidade no seriedade hodi ezekuta no presiza koopera ho Organizaun Sociedade Sivil - OSS oinsá atu asegura informasaun ne'e to'o iha comunidade no sira bele kompriende.</p>
<p>KAPÍTULU II DIREITU NO DEVER KLIMÁTIKU SIRA Artigu 7 “Direitu Klimátiku Sira”</p>			
	<p>Artigu 7; Alinea 1; Sidadaun Timor-Leste sira iha direitu ba ambiente ida-ne'ebé moos, saudavel no sustentável tuir termu sira ne'ebé estabeselese ona iha Konstituisaun Timor-Leste nian no konvensaun, tratadu no akordu internasionál sira ne'ebé aplika iha sistema jurídiku interna Timor nian.</p>		<p>Konkorda no apresia ho alínea ida ne'e, maibé la'ós de'it to'o iha ne'e, maibé ami rekomenda atu mínimu tenke kria no estabeselese padraun ida, hanesan mata dalan.</p>

	<p>Artigu 7; Alinea 4; Estadu sei fasilita partisipasaun públiku liu husi konsultasaun públiku, liu husi submisaun tradisionál hakerek nian, no seksaun informasaun no debate nian sira entre sidadaun Timór-Leste no sira ne'ebé mak responsavel ba foti desizaun relasiona ho política Klimátika:</p> <p>a) Liu husi iniciativa husi Administrasaun; ka b) Liu husi submisaun husi pelumenus sidadaun Timor-Leste na'in [30].</p>	<p>Konsultasaun no sosializasaun iha prosesu elaborasaun dadus no informasaun importante tebes no tenke loos, kompletu no tuir tempu. No presiza mós iha meius seluk ne'ebé utiliza hanesan Free, Prior, Informed Consent (FPIC) atu comunidade sira ne'ebé hola parte iha prosesu konsultasaun no sosializasaun públiku, konsiente ba informasaun ne'ebé sira hetan.</p>	<p>Nune'e ami rekomenda atu iha sosializasaun aplika ka utiliza standardizasaun FPIC, ne'ebé la'ós de'it sosializa kona-ba dokumentu no informasaun de'it, maibé comunidade sira ne'ebé partisipa iha prosesu ne'e bele rona ho konsientemente no labele hetan presau husi entidade balu no iha direitu tomak atu dehan lae ka deskorda ho projetu refere no labele repete hanesan prosesu balu ba lisensiamentu ambientál husi projetu boot sira (Ezemplu projetu perfurasaun mina iha Suai, comunidade tenke konsiente no iha koñesimentu kle'an ba atividade perfurasaun, no la'ós de'it halo sosializasaun no konsultasaun atu responde de'it rekezitu – Tick box de'it).</p> <p>No ami rekomenda atu artigu ida ne'e loke tan alínea ida (alínea 4, c) hodi fó espasu ba OSS, katak, bainhira OSS husu atu halo sosializasaun la presiza tenke ema to'o na'in 30.</p>
	<p>Artigu 7; Alinea 5; Ba objetivu husi parágrafo 3 no 4 iha leten, informasaun ne'ebé klaru, sistemátiku no fasil atu asesu sei fó sai ba sidadaun Timor-Leste tomak.</p>		<p>Artigu di'ak, maibé tenke aplika ba entidade governu hotu antes halo konsultasaun, comunidade tenke informadu ona.</p>

	<p>Artigu 7; Alinea 6; a, b no b);</p> <p>a) Hahú ka hatama prosesu judisiál atu defende direitu subjektivu no interese ne'ebé legálmente protejidu no atu ejerse sidadaun nia direitu atu foti asaun;</p> <p>b) Promove prevensaun, seksaun no reparasaun ba risku sira ba ambiente ida-ne'ebé moos, saudavel no sustentavel; no</p> <p>c) Hetan despaxu judisiál ne'ebé adekuadu hodi hapara kedas atividade ne'ebé hamosu ameasa ka estraga ambiente ne'ebé moos, saudavel no sustentavel.</p>	<p>Ami apresia ba artigu ne'e no Timor-Leste rai ida ki'ik, no evita atu fó risku ba ambientál no mós ba sidadaun ho populusaun ne'ebé mais ou menus hamutuk ona tokon I.4.</p>	<p>Apresia ba alínea ida ne'e, ami rekomenda atu iha rekursu umanu ne'ebé iha abilidade no husu atu kontrola kualkér akordu ne'ebé empreza ruma halo, tenke sujeita ba artigu ida ne'e, (tanba iha pratika empreza sira tau risku ba comunidade – Atividade TR iha Suai – Halo akordu ho comunidade maibé comunidade sira rasik la hatene konteúdu husi kada artigu hodi comunidade tenke asume nia impaktu negativu).</p>
Artigu 8 “Devér Klimátiku Sira”			
	<p>Artigu 8; Alinea 2;</p> <p>Estadu mak responsavel ba promosaun sidadania Klimátika iha nivel polítiku, tékniku, kulturál, edukativu, ekonómiku no jurídiku.</p>	<p>Los duni katak estadu iha responsabilidade tomak maibé ajénsia internasionál sira mós iha devér ida atu halo promosaun.</p>	<p>Alende estadu, Ajénsia Internasionál no mós embaixada sira iha devér ida atu kontribui hodi halo promosaun no apoia ba asuntu mudansa Klimátika.</p>

KAPÍTULU III GOVERNASAUN KONA-BA MATÉRIA KLIMÁTIKA Artigu 9 “Estabelesimentu Konsellu Nasional Asaun Klimátika”			
	<p>Artigu 9; Alinea 4; KNAK ninia misaun maka servisu hamutuk ho Parlamentu Nasionál no Governu, liu husi preparasaun estudu, avaliasaun no opiniaun sira kona-ba asaun Klimátika no polítika, desizaun no programa sira ne'ebé iha relasaun ho asaun Klimátika bazeia ba konsellu sientífiku ne'ebé di'ak liu hotu ne'ebé disponivel.</p>	<p>Ita iha esperiéncia governu forma konsellu hanesan KKFP ne'ebé nia servisu limita no KNAK ne'e rasik mós nia servisu limita hotu, presiza fó mandatu ba KNAK ne'ebé luan no la'ós de'it atu fó konsellu, ne'ebé to'o ikus rezultadu analiza husi KNAK para atu kompleta de'it rekezitu maibé tenke hetan konsiderasaun no KNAK rasik mós tenke ativu halo advokasia ba asuntu ambientál.</p> <p>Se KNAK nia servisu atu fó de'it konsellu, di'ak atu la estabelese ne'ebé to'o ikus transforma ba Empreza Públiku (E.P.) ka Institutu Públiku (I.P.), hodi kontinua fó todan ba despeza estadu.</p> <p>Ami mós hanoin katak mekanizmu rekrutamentu sei hamosu diskriminasaun, tanba sei difisil atu identifika membru ida husi reprezenta suku hamutuk 498.</p> <p>Apresia tanba bele fó oportunidade ba comunidade maibé mekanizmu rekrutamentu tenke rigor no la'ós atu hetan oportunidade servisu de'it.</p>	<p>Ami rekomenda atu KNAK nia servisu la limita maske nune'e la signifika atu dupla servisu ANLA nian. Tenke iha orientasaun klaru ba servisu no evita atu diresaun no konsellu sira transforma an ba E.P. no I.P.</p>
	<p>Artigu 9; Alinea 8. a); Prezidente ida nomeadu husi Parlamentu Nasionál;</p>	<p>Se karik estabelese Konsellu KNAK, di'ak atu ema ne'ebé lidera eleitu husi membru sira no la'ós nomea husi Parlamentu Nasional ho hanoin atu evita konflitu interese.</p>	<p>Ami rekomenda atu Prezidente KNAK nomea husi membru sira no la'ós nomea husi Parlamentu Nasional atu evita konflitu interese polítika.</p>

	<p>Artigu 9; Alinea 8. f); Membru ida nomeadu husi asosiasaun meu ambiente no protesau Klimátika sira;</p>	<p>Kona-ba nomeasaun ba membru KNAK, karik iha nasaun balu iha asosiasaun ka grupu ne'ebé foku ba asuntu ambientál, maibé iha Timor-Leste di'ak atu envolve mós grupu NGO sira ne'ebé karik eleitu liu husi FONGTIL maibé tenke prienxe rekezitu.</p> <p>Ami preokupa kona-ba mekanizmu rekrutamentu husi membru sira, ezemplu representante husi suku, mekanizmu saida mak atu utiliza hodi hili representante suku husi suku hamutuk 400 resin inklui mós representante feto.</p>	<p>Atu hili membru sira husi munisípiu, RAEOA to'o iha nivel suku, ami rekomenda atu rigor ba identifika membru, nune'e la bele repete konsellu sira ne'ebé forma ona hodi prienxe de'it rekezitu.</p>
<p>Artigu 11 “Avaliasaun Impaktu Klimátiku Lejizlasaun Nian”</p>			
	<p>Artigu 11; Autoridade no ministériu hotu-hotu tenke avalia impaktu hotu-hotu husi ka kona-ba Mudansa Klimátika tanba introdusaun lejizlasaun foun, no loke avaliasaun ne'e ba públiku molok atu halo aprovasaun ba lejizlasaun ne'ebé relevante.</p>		<p>Asuntu ambientál no kuaze projetu boot sira, sei fó impaktu ba ambientál ne'ebé sei prejudika ba ema hotu, di'ak atu la'ós envolve de'it ministériu sira ne'ebé relevante maibé inklui mós ajénsia autonomia sira no institutu públiku no empreza públiku sira, inklui ANP, ANM, TimorGAP, EDTL, ANATL, APORTIL inklui mós sira seluk.</p> <p>Bainhira kompañia sira hetan lisensa ba projetu, sira mós tenke fó prioridade no konsidera ba sira nia aktu ba mudansa klimátika.</p> <p>Ami rekomenda mós atu halo avaliasaun ba Lei lisensiamentu ambientál atu konsidera ba mudansa klimátika – Dekretu Lei No. 5/2011.</p>

Artigu 12 “Estratéjia Asaun Nasionál ba Mudansa Klimátika”		
<p>Artigu 12; Alinea 3; a): Prevee dezenvolvimentu estratéjia karbonu ki'ik ne'ebé aliña ho dispozisaun sira husi Akordu Paris no ho objetivu fundamentál atu limita temperatura globál sa'e ba 1.5°C iha nivel pré-indústria;</p>	<p>Akordu Paris no mós konferénsia boot sira (COP), hanesan parte ida atu diskute no tau kometimentu hamutuk hodi redús no mantén mudansa klimátika inklui mudansa temperatura grau 1,5°C, maibé infelizmente iha tinan 10 ikus emisaun no temperatura manas kontinua sa'e no boot liu ona kompara ho meta ida ne'e, no la'ós de'it ba mudansa temperatura, maibé inundasaun, rai maran no inklui moras foun sei barak. Timor-Leste rasik nia kontribuisaun ba mudansa klimátika ki'ik maibé ami hanoin katak Timor-Leste presiza no tenke define meta no asaun konkretu balu ba redús temperatura nia manas.</p>	<p>Atu define meta no asaun balu mak, tenke redús ona atividade indústria mina-rai no gas hodi redús no mantén temperatura global.</p>
KAPITULU IV MITIGASAUN SESAUN I DISPOZISAUN JERAL SIRA Artigu 13 “Alvu Mitigasaun ba Tempu Naruk”		
<p>Artigu 13; Alinea 1 Estadu tenke estabelese ambisaun ne'ebé aas liu kona-ba Mitigasaun ne'ebé refleta sirkunstánsia nasional no buka atu atinje nia objetivu atu limita temperatura globál sa'e to'o 1,5°C, sein prejuizu ba obrigasaun hirak ne'ebé mai husi konvensaun, tratadu no Akordu internasionál sira ne'ebé vigora iha sistema jurídku Timór-Leste nian, grau envolvimentu husi setór privadu no husi parseiru dezenvolvimentu sira.</p>	<p>Temperatura manas iha 1.5°C hanesan tarjetu ne'ebé estabelese ona iha tinan 2015, atu redús no mantén tanba iha atividade barak no nasaun industrializadu sira kontinua la hapara sira nia indústria inklui atividade estrativa. Mudansa klimátika la'ós de'it ko'alia kona-ba mudansa temperatura nia manas, maibé tenke diskute mós kona-ba rai halai/rai monu, udan la tuir nia tempu, inundasaun, bee maran, no klima ne'ebé la tuir ona espektasaun.</p>	<p>Ami hanoin katak maske Timor-Leste nia kontribuisaun ba mudansa klimátika ki'ik tebes maibé ami rekomenda atu Timor-Leste rasik tenke hahú ona aplika standarizasaun ida as husi saida mak Standar Internasionál sira aplika kona-ba nivel mínimu (<i>Lowest Common Denominator</i>).</p>
<p>Artigu 13; Alinea 2; Estadu tenke uza esforsu ne'ebé di'ak liu hodi dezenvolve no aprova meta nasional sira ba redusaun Gás ho Efeito Estufa nian iha tempu naruk nia laran, no konsidera meta sira ne'ebé define ona iha Akordu Paris, no konsidera sirkunstánsia nasional sira iha Timór-Leste.</p>	<p>Mudansa klimátika ohin loron fó ona prejuizu barak, kauza boot mai husi indústria mina-rai no gas inklui mineiru, no indústria sira seluk, no ami hanoin katak la presiza halo define ba tempu naruk, atu fó risku no prejuizu boot liu tan ba país vulneravel sira.</p>	<p>Ami rekomenda atu akordu Paris no deklarasaun sira iha <i>Conference of the Parties</i> hatudu iha asaun no tenke iha kometimentu redús no hapara atividade ne'ebé nafatin kontribui ba emisaun.</p>

SESAUN II APROSIMASAUN SIRA BAZEIA BA MERKADU Artigu 14 “Projetu Sekestrasaun Karbonu no Merkadu Karbonu nian”		
Artigu 14; Alinea 1: Membro Governu ne'ebé iha kompeténsia ba Mudansa Klimátika bele publika regulamentu sira kona-ba implementasaun projetu, programa no/ka atividade sira atu halakon no/ka hamenus emisaun Gas ho Efeito Estufa no oinsá atu fasilita asesu ba Merkadu Karbonu liuhusi projetu, programa no/ka atividade sira hirak ne'e.	Kona ba Projetu Kaptura Karbonu (projetu CCS), dokumentu barak hatudu país barak falla no kansela tanba kustu boot no promessa sira tuir rekezitu la implementa no kona ba merkadu karbonu La'o Hamutuk la'ós kontra merkadu karbonu tomak maibé tenke sukat, katak bainhira fa'an karbonu no hamenus karbonu iha atmosfera ami lakohi atu uza Timor-Leste nia <i>carbon trading (Fa'an Timor-Leste nia kréditu karbonu ba nasaun dezvoltidu)</i> hodi prienxe rekezitu hodi país ne'ebé kontribui ba emisaun gas estufa kontinua hala'o sira nia atividade ba kontribui emisaun gas estufa. Ezemplu hanesan Timor-Leste simu karbonu husi Nasaun Australia atu fó lisensa ba Kompañia Santos atu dezvoltolve kampu Barossa.	Ami rekomenda atu evita atitude sira ne'ebé la afavor ba redús mudansa klimátika maibé kontinua promove, hanesan Projetu Sekestrasaun Karbonu. Husi ami nia hanoin katak artigu 14 tomak presiza hadi'a tan nia konteúdu atu la halo konfuzo, tanba iha nia redasaun ladún klaru ba se loos mak na'in ba karbonu, liu-liu bainhira utiliza Bayu-Undan ba CCS. Karbonu mai husi Australia hodi rai hela tasi okos kampu Bayu-Undan. Timor-Leste hanesan na'in maibé labele simu responsabilidade ba karbonu husi li'ur.
Artigu 14; Alinea 2. a); Estabelese kuadru ida ba projetu, programa no atividade sira atu halo redusaun ba emisaun Gas Estufa sira nian iha Timór-Leste, inklui integrasaun mekanizmu atu fasilita Timór-Leste nia partisipasaun iha âmbito Akordu París nia Artigu 6;	Iha natureza merkadu nian, dala balu nia prosesu la'o la tuir regra, nune'e ami hanoin katak importante atu asegura nia prosesu la'o ho transparénsia hodi ema hotu bele akompañia no pagamentu sira ba direitu na'in sira tenke sente no fó benefísiu duni.	La'o Hamutuk sempre ezije atu nia prosesu la'o ho transparénsia no ami hanoin katak importante atu estabelese padraun ida hodi tau matan iha prosesu merkadu nian. No ami rekomenda atu fó mós atensaun atu halo kontrolu ba emisaun ne'ebé mai husi Scope 3.
Artigu 14; Alinea 2. b); Asegura katak direitu sira karbonu nian ne'ebé relasiona ho redusaun emisaun (inklui liu husi Sekestrasaun) nian pertense ba na'in ba sasán sira ne'ebé rai hela emisaun Gas ho Efeito Estufa sira ne'e (liu-liu ai-horis no/ka rai, ka kualkér rikusoin sira seluk ne'ebé maka liuhosi sira mak bele hamenus ka hasai Gás ho Efeito Estufa);	Em jerál, ami apresia kona-ba konsiderasaun ba na'in husi asaun ne'ebé halo (Kuda ai no seluk tan) hodi rai emisaun. Maibé karik artigu ida ne'e bele asegura katak, kréditu karbonu ne'e sei la fa'an ba kompañia estrativa ka ema seluk atu ema ka kompañia iha lejitimidade hodi kontinua hala'o sira nia atividade?	Ami rekomenda atu labele fa'an karbonu ba kompañia estrativa sira hodi iha lejitimidade atu kontinua halo estrasaun iha fatin seluk ne'ebé sira la halo asaun hodi redús emisaun.

Artigu 15 “Floresta no Espasu Matak Sira”			
8.	Artigu 15; Alinea 1: Estadu sei promove floresta ne’ebé sustentavel no reziliente hodi rekoñese kapasidade Sekestrasaun florestál ida no promove comunidade lokál sira bele asesu ba Merkadu Karbonu sira	Mudansa klimátika ohin loron, ezije ita hodi iha asaun barak ba prevene no ami konkorda katak, tenke iha asaun barak ba florestasaun no kontinua mantén area matak sira hodi eziste. Maibé florestasaun ne’e mós presiza iha identifikaun ai ne’ebé la prejudika ba rezerva bee rai okos. Reflorestasaun hanesan parte ida de’it husi asaun barak ba prevensaun no sei iha aspetu lubuk ida ne’ebé presiza no tenke konsidera.	Ami nia rekomendasaun mak, identifika ai no area sira atu labele estraga fali ai laran tuan ne’ebé eziste. Presiza iha estudu antes atu labele destroi ai laran no ai horis sira seluk no presiza tuir konseitu di’ak sira husi nasaun dezvoltadu kona-ba reflorestasaun no kontekstualiza.
Artigu 20 “Planu Asaun Nasional ba Adaptasaun ba Mudansa Klimátika”			
9.	Artigu 20;	Ami hanoin katak Adaptasaun importante ba prevensaun mudansa klimátika, maibé adaptasaun hanesan meius ki’ik ne’ebé tenta atu kontinua fó risku ba ambiente no sosiedade. País ki’ik no vulneravel sira mak sempre sai vítima ba país dezvoltadu sira nia aktu.	Aleinde adaptasaun, ami hanoin katak mitigasaun importante liu. No ami rekomenda, Planu adaptasaun ba Mudansa klimátika, la presiza halo iha kada tinan lima maibé ami rekomenda atu kada tinan tolu. Nune’e mós atu país dezvoltadu ne’ebé kontribui hodi estraga atmosfera, tenke asume an no responsabiliza sira nia aktu inklui mós redús no hapara sira nia atividade estraga atmosfera.

KAPÍTULU VII FINANSIAMENTU KLIMATIKA			
Artigu 27 “Estabelesimentu Fundu Nasionál ba Mudansa Klimátika”			
10.	Artigu 27;	<p>Loos katak mudansa klimátika ohin loron ita hotu preokupa, no presiza iha kometimentu ba implementasaun, no estabelesimentu Fundu ba Mudansa klimátika, tenke refere ba asaun sira ne'ebé direta ba adaptasaun no mitigasaun. Ami preokupa ho Timor-Leste nia balansu Fundu Petróleu sei labele rezolve hodi redús mudansa klimátika bainhira país industrializadu sira kontinua halo esplorasau ba indústrria mina-rai no gas, no atividade minériu.</p> <p>Ba kapítulu estabelesimentu Fundu Nasionál ba Mudansa Klimátika, ami hanoin presiza halo klaru, ba nia objetivu no se loos mak atu prepara Fundu refere, kompañia ne'ebé kontribui ba prodús emisaun ka estadu Timor-Leste mak prepara.</p> <p>Ami mós preokupa ho artigu ida ne'e tanba projetu kuda ai karbonu iha tinan balu ba kotuk hahú halo kontratu ona ho komunidadade ba kuda ai karbonu, atu evita agrikultór prodús ai-han sira transforma nia produktu ba kuda ai, ne'ebé bele fó risku ba in-seguransa ai-han.</p>	<p>Se artigu ida ne'e nia objetivu atu regula de'it Fundu ne'ebé mai husi ajénsia no fundu klimátika (GCF), presiza mós iha kontrolu ba implementasaun, ho hanoin evita agrikultór sira transforma sira nia atividade ba prodús ai-han ba kuda de'it ai hodi responde ba merkadu karbonu, ne'ebé fó risku ba in-seguransa ai han, inklui fó todan ba osan povu nian.</p>
Artigu 31 “Polítika Investimentu Estadu Nian”			
11.	Artigu 31;		<p>Aleinde polítika investimentu, ami rekomenda atu ajénsia internasionál (ADB, World Bank, JICA no ajénsia internasionál sira seluk) Inklui mós Kompañia sira ne'ebé kontinua kontribui ba Mudansa klimátika, atu halo investimentu maka'as no tenke iha polítika no kompromisu ba kontribui hodi halo prevensaun no mitigasaun mak barak duke adaptasaun ba mudansa klimátika. Maske Timor-Leste labele kontrola ajénsia internasionál sira, TL bele uza vota no presau atu influencia sira.</p>

SESAUN VIII ENERJIA Artigu 33 “Polítika no Enerjetika”			
12.	Artigu 33;	<p>Polítika global ohin loron, iha diskusaun barak ba Enerjia renovavel no ami konkorda atu promove polítika enerjetika ne'ebé sustentável no eficiente liu.</p> <p>Durante ne'e, ita nia enerjia eletrisidade (281 Mw) ohin loron (Husi sentral tolu, EDTL Hera, Betano, Comoro no Atauro) ho kapasidade boot, maibe ita la konsege utiliza ho efikasía hodi enerjia barak mak lakon leet de'it, hodi kontinua fó todan ba despeza estadu kada tinan.</p>	<p>Ami rekomenda atu identifika didi'ak enerjia sira ne'ebé iha possibilidade fó vantajen maibe evita mós atu la fó risku ba ambiental no sosial, no tenke iha estudo kle'an no kustu operasionál ne'ebé la fó todan ba povu nian osan no iha tempu hanesan tenke sosializa atu sociedade utiliza enerjia ho responsabilidade no tuir nesidade no sente sai na'in, liu husi halo edukasaun públuku.</p> <p>Tenke promove ona enerjia renovavel no konsersasaun.</p>
SESAUN IX TRANSPORTE Artigu 36 “Rede Transporte Públuku”			
13.	Artigu 36;	<p>Ami apresia no konkorda ho artigu ida atu promove transporte maibe ami hanoin katak artigu ida ne'e seidak espesífuku ba tipu transporte, no ami hanoin katak Timor-Leste forma ho lla ida ne'ebé hale'u ho tasi, iha possibilidade atu promove transporte maritima nian.</p>	<p>Alende promove transporte terrestre ba hamenus emisaun karbonu, ami hanoin katak importante atu hanoin no promove mós ba transporte marítimu.</p>
Seksaun X TEKNOLOJIA Artigu 37 “Teknolojia-sira ba Transporte Privadu”			
14.	Artigu 37; Alinea I; Estadu tenke insentivu akizisaun no utilizaun ba veikulu elétriku, hibrida ka ho gás renovavel sira, ka veikulu-sira ho kombustivel seluk ne'ebé la emite Gás ho Efeito Estufa.	<p>Konkorda atu governu promove ba veikulu elétrika, maibe tanbasá tenke insentivu? Timor-Leste la hanesan ho país dezenvolidu sira ne'ebé iha forsa finanseiru boot.</p>	<p>Konkorda ba promove veikulu elétrika, maibe la signifika governu tenke insentivu, no ami rekomenda atu aplika taxa ba gasolina no gazoel.</p> <p>Nune'e mós ami rekomenda atu evita utiliza karreta barak no evita halo moris karreta bainhira para hela, tanba dala balu kuaze membru governu sira nia karreta bainhira para maibe nia mákina moris nafatin no kontinua loke Air Conditioner (AC).</p>

Artigu 38 “Teknolojia Kapturasaun Karbonu no Armazenamentu”			
15.	Artigu 38; Alinea 1; Estadu tenke analiza no apoia dezvoltimentu teknolojia Kaptura no Armazenamentu Karbonu.	Nasaun industrializadu no kompañia petrolíferu barak promove polítika ba CCS, ho objetivu atu subar emisaun gas estufa. Hanesan sosiedade sivil, ami konkorda katak tenke iha kometimentu redús emisaun gas estufa maibé, ita lakohi atu nasaun boot sira nia gas estufa hodi injeta ba territóriu Timor-Leste nian, hanesan MoU ne'ebé Governu halo ona ho Kompañia Santos ba utiliza Kampu Bayu-Undan ba atividade Kampu Barossa nian. No ami konkorda ho polítika CCUS no CCS hanesan meius ida hodi redús emisaun gas estufa, maibé deskorda atu aplika CCS hodi kontinua destroi planeta ida ne'e.	Ami rekomenda atu iha estudu kle'an kona ba risku no benefísiu molok iha konkordánsia atu realiza projetu CCS. Ami prefere atu hapara totalmente atividade indústria mina-rai no gas ne'ebé kontribui maka'as ba mudansa klimatika no la'ós atu uza CCS hodi justifika ba facilita indústria estrativa. Ami rekomenda atu haree didi'ak kada artigu no bainhira halo ona redasaun final, presiza revee ho kle'an tanba artigu ida ne'e ho versaun Ingles nia tradusaun diferente.
16.	Artigu 38; Alinea 2; Estadu tenke promove projetu sira kona-ba implementasaun teknolojia Kaptura no Armazenamentu Karbonu nian iha beeposu sira ba esplorasau petroléu no gás ne'ebé dezativadu no iha área sira iha territóriu nasional ne'ebé iha emisaun aas.	Tanbasá tenke promove? Karik ho intensaun atu bele hetan retornu ka atu redús emisaun? Tanba pratika CCUS no CCS, iha país barak kansela no hapara projetu refere. Projetu ida ne'e mós sei hanesan pilotu ne'ebé seidak hatudu nia efisiénsia ba kaptura karbonu, no Timor-Leste rasik seidak iha koñesimentu atu kontrola no tau matan, hodi la fó risku no prejuizu ba estadu (finanseiru) no ambiental.	Se governu kontinua atu implementa projetu CCUS no CCS hanesan meius atu kontinua fó lisensa ba kompañia hodi halo esplorasau, ami rekomenda atu Kompañia no produtór emisaun mak responsabiliza kualkér risku no asegura nia konsekuénsia inklui tenke halo kontrolu másimu ba posu refere no responsabiliza ba tempu naruk bainhira mosu risku iha futuru

Seksaun XI INDÚSTRIA ESTRATIVU-SIRA			
Artigu 39 “Operasaun Petróleu no Mineiru”			
17.	Artigu 39; Alinea 1, 2, no 3.	<p>Ami hanoin katak artigu ida ne'e presiza iha esklaresa ho di'ak, no presiza iha analiza profundu molok deside hanesan artigu rua ba atividade sira ne'ebé temi.</p> <p>Tanba ami hanoin katak asuntu mudansa klimátika tenke iha seriedade no foti asaun konkretu antes kontinua ba atividade sira ne'ebé kontinua fó risku ba planeta ida ne'e.</p> <p>Maske ami konkorda ho artigu primeiru, maibé tenke halo asesmentu ba atividade petróleu no mineiru molok hala'o atividade no konkorda ho artigu terseiru ho objetivu asegura no garantia area protejidu sira hodi kontinua nafatin proteje, fó mahon no fó ár ne'ebé fresku.</p>	<p>Ami konkorda no apresia maibé ami hanoin no rekomenda atu tenke iha estudu no analiza kle'an ba alínea 2 antes implementa no ami rekomenda mós atu iha kometimentu no tenke iha asaun duni hodi asegura atividade petróleu no mineiru, maske ami nia pozisaun klaru katak, atividade petróleu no mineiru, hanesan parte husi destroi ambiente.</p> <p>Ami rekomenda mós atu asegura duni area protejidu sira husi destroisaun ba atividade petróleu no mineiru.</p> <p>Ami husu atu halo klarifikasaun ba artigu 39 kona ba Operasaun Petrolíferu no Mineiru, ami hanoin katak artigu ida ne'e nia konteúdu ladún klaru.</p>
Seksaun XII BEE no LIXU			
Artigu 40 “Bee no Saneamentu”			
18.	Artigu 40;	<p>Alende ami konkorda ho artigu ida ne'e, Governu mós iha papél importante hodi asegura atu bee la bele maran. No bee hanesan rekursu importante no nesesáriu ba ema no elementu hotu-hotu, no evita atu ema no grupu ka empresario sira utiliza ba sira nia interese (komersiál).</p>	<p>Tanba kauza mudansa klimátika, rezulta mós rezerva bee rai okos menus, nune'e ami rekomenda atu governu iha polítika ida atu halo konsersasaun bee hodi asegura rezerva bee iha rai okos inklui asegura no obriga atu autór sira ne'ebé kontribui fó risku ba rezerva bee rai okos inklui halo kontaminaun bee no ambiente atu responsabiliza.</p> <p>Ami mós rekomenda atu la'ós de'it promove ba uzu bee ho efisiente maibé mós ba iha asuntu utilizaun enerjia eletrisidade.</p>

Artigu 41 “Lixu”			
19.	Artigu 41;	Konkorda atu halo resiklajen ba lixu no Timor-Leste kuaze atu domina ho lixu, nune’e presiza iha kometimentu ba polítika no lei ne’ebé iha ona, hodi kontrola produstu sira hanesan plástiku, besi at, inklui karreta tuan sira ne’ebé dala barak para loos iha estrada ninin. Kuaze governu iha regra no polítika lubuk ida ne’ebé eziste ona, atu redús lixu maibé iha pratika kuaze la la’o.	Artigu ida ne’e di’ak no apresia maibé la’ós de’it atu halo resiklajen maibé tenke hamenus lixu, liu-liu ba produstu plástiku sira no besi at (besi tua). Inklui mós governu tenke iha seriedade no kometimentu ba aplika lei no polítika sira ne’ebé eziste ona atu redús lixu no tenke iha xamada no fó sansaun, karik mós pena todan ba autór sira ne’ebé la kumpre. Ami rekomenda mós ba kompañia sira ne’ebé kontribui ba poluisaun tenke responsabiliza, no redús importasaun plástiku sira.
SESAUN XIII AGROFLORESTÁL, PESKA NO AKIKULTURA			
Artigu 42 “Agrikultura ho karbonu ki’ik”			
20.	Artigu 42;	Timor-Leste sei iha rai potenciál barak atu halo produsaun no kuaze rai sira ne’e seidauk kontaminadu ho kímiku barak, ho nune’e presiza asegura atu mantén rai sira nian orijinalidade no evita atividade boot liu-liu ba industrializasaun ne’ebé kontribui ba destroi rai.	Rekomenda atu mantén rai nia orijinalidade no governu presiza kontrola no asegura atu rai produtivu sira la destroídu ba indústria sira no transforma ba konstrui loja no hela fatin.
SESAUN XIV EDUKASAUN			
Artigu 44 “Polítika Edukasaun Klimátika”			
21.	Artigu 44;	Atu integra polítika kona-ba edukasaun klimátika iha kurríkulu, hanesan pasu di’ak ida oinsá atu ema hotu bele intende no iha koñesimentu ba kauza husi mudansa klimátika no oinsá atu kontribui ba redús no prevene mudansa klimátika. Maibé importante mós presiza sosiedade iha planeta ida ne’e nia asaun ba kontribui redús mudansa klimátika.	Ami rekomenda atu nasaun industrializadu sira mak tenke konsiente no foti asaun barak hodi evita maske la signifika nasaun ki’ik sira la presiza kontribui atu halo prevensaun ba mudansa klimátika.
Artigu 46 Organizasaun naun-governamental ambientál sira			
22.	Artigu 46 Estadu tenke apoia asosiasaun sira ne’ebé atua atu proteje ambiente no kombate Mudansa Klimátika, hodi fasilita sidadaun sira-nia sensibilizasaun kona-ba importánsia husi asaun Adaptasaun no Mitigasaun.	Ami hanoin katak Governu kria ona Fundu liu husi SASCAS, no apoia iha ne’e presiza klaru (Apoia finanseiru ka tékniku). La presiza kria fundu barak.	Ami rekomenda atu governu tenke respeita OSS sira ne’ebé durante tinan barak halo advokasia ba asuntu ambientál no respeita mós sira nia integridade. Ami rekomenda atu evita kria fundu barak.

SESAUN XVII TURIZMU Artigu 49 “Turizmu”			
23.	Artigu 49; Alinea 1, 2, no 3;	Iha nasaun dezenvidu balu, aplika ona taxa ambiental ba turista sira bainhira vizita fatin turizmu, ne'e hanesan meius ida atu asegura ambiente nafatin di'ak no sustentavel. Karik Timor-Leste bele hahu hano in atu oinsá kustu manutensaun ba fatin turizmu labele kontinua depende ba Fundu Petróleu.	Apresia ba artigu ida ne'e, no karik Timor-Leste bele hahu ona aplika taxa ambiental ba turista sira bainhira sira mai vizita Timor-Leste, ho intensaun atu bele asegura fatin sira nafatin furak no sustentavel, nune'e mós governu bele hahu planu oinsá atu fasilita turista sira mai Timor-Leste ho Ró hanesan opsaun no la'ós ho Aviaun de'it.
KAPÍTULU IX APLIKASAUN NO SANSAN Artigu 51 “Enkuadramentu Responsabilidade no Sansaun”			
24.	Artigu 51; Alinea 1, no 2;	Iha pratika Sansaun, dala barak governu adopta sansaun kmaan, nune'e kompañia sente avontade hodi kontinua viola regra ne'ebé iha. Nune'e ba lei ida ne'e, governu tenke iha duni seriedade no fó efeito todan hodi autór estraga ambiental labele kontinua repete sira nia aktu. Seluk, governu bele mós konsidera pratika di'ak balu ne'ebé kompañia sira halo hodi kontribui ambiente ida di'ak.	Ami rekomenda atu fó Sansaun no multa ba autór estraga ambiental, tenke hetan duni Sansaun todan, inklui mós tenke tama prizaun hodi asume nia hahalok no hapara nia lisensa ambiental, no sansaun sira refere bazeia ba lei ambiental ne'ebé eziste ona. Tanba mudansa klimatika ohin loron fó prejuizu ba ema barak, nune'e ami rekomenda atu halo definisaun lei spesífiku ba sira ne'ebé viola no kontra.
KAPÍTULU X DISPOZISAUN FINAL NO TRANZITÓRIU Artigu 52 “Kooperasaun Internasionál”			
25.	Artigu 52;	Ba artigu ida ne'e, alende promove kooperasaun internasionál ba mudansa klimatika, ami hano in katak konsuladu no embaixadór sira bele halo diplomasia hanesan representante estadu atu ko'alia kona ba asaun ba mitigasaun. Dala barak kooperasaun internasionál sira nia programa kontribui mós ba iha mudansa klimatika no mós iha konferénsia hanesan COP, ASEAN, ONU no WTO.	Ami rekomenda atu kooperasaun internasionál sira ba asuntu mudansa klimatika, aproveita kooperasaun sira hodi ko'alia mós asaun ba mitigasaun, inklui mós ko'alia ho parseiru desenvolvimentu sira atu redús sira nia programa ne'ebé kontribui ba emisaun gas estufa. Karik mós bele konsidera ka kria artigu ida hodi fó konsiderasaun ba refujiadu sira tanba afeta husi mudansa klimatika no nasaun industrializadu sira tenke responsabiliza.